

INUIT ATAQATIGIIT INATSISARTUNI



1. marts 2024

UPA2024/49

Inatsisartut Suleriaasianni § 33 naapertorlugu aalajangiiffigisassatut siunnersuut imaattoq matumuuna saqqummiuppara:

Nunatsinni nerisassiarineqartut pisiniarfinni akiinut suut tunngaviusarnerat pillugu Naalackersuisut nassuiaasiornissamik peqquneqarnissaannik Inatsisartut aalajangiiffissaattut siunnersuut. Nioqqutissat akitigut pisisartunut pilerinarnerulersinniarlugit qanoq iliortoqarsinnaanera nassuiaammi ilanngullugu tikkuarneqassaaq. Nassuiaat kingusinnerpaamik UKA2024-mi saqqummiunneqarsimassaaq.

(Inatsisartunut ilaasortaq Mariane Paviasen, Inuit Ataqatigiit)

Tunngavilersuut:

Siunertarput tassaavoq namminiilivinnissarput, siunertarput tassaavoq immitsinnut annerusumik pilersulernissarput, nuna nammineersooq tassaasariaqarpoq minnerpaamik nunap iluaneersunik innuttaminut annertuumik nerisassaqaarnikkut pilersuisinnaasoq. Tamanna ullumikkut angusimanngilarput. Ilisimavarput nunatsinni nerisassiat pisiarinissaat ajornakusoortoq, akisuallaarujussuarpummi, utoqqartagut kalaaliminertornissamut akissaqaangillat, inuussuttortatta kalaaliminertorneq ilaatigut nalulilerpaat angajoqqaat kalaaliminernut akisuallaannut tamatigut akissaqarneq ajormata- Pissutit atukkatta taamaannerat illua'tungaanut saatissagutigu tigussaasumik tunngaveqarluta suliaqartariaqarpugut. Siunertaassaaq innuttaasugut nunatta nerisassaataanut akissaqarluta pisisinnaajuarnissarput..

Naluneqanngilaq nunatta iluani nioqqutissiorneq pisiniarfinnut apuuneranni akisoorujussuanngorlutik apuuttarnerat. Assersuutissaaq tassaavoq savap neqaa savaatilinniit kilumut 55,-kr missaanik akilerlugu Neqi A/S-imit pisarineqartarpoq niuertarfinnulli apuukkaangami kiilumut 150,-kr sinnerlugu akeqalersimasinnaasarpoq. Assigaa Saarullik kiilumut aalisartunut 4-5 kr-ilerlugu pisarineqartarpoq pisiniarfinnilu uagut kiilumut 108,-kr miss. akilersinneqartoq pisiarisinnaalersarparput. Uaniluunniit eqqaanngilakka mattaat, timmissat, aalisakkat panertitat, pujuukkat, katorfilit, nunatsinni aamma tunisassiarineqartut.

Siunnersuutip uumap siuertarinngilaa inuussutissarsiuqartunut eqquinerlunnissaaq, kingunerissanngilaattaaq nerisassaqaqtinniarluta tunisassiortut akikinnerusumik nioqquteqatinneqalernerannik illu'tungaanilli kingunerisariaqarjaa tunisassiornerup akilersinnaasumik pisisartumullu tunisassiappisiarinissaata kajungernarnerulersinneqarnera Tamanna politikikkut aqutissiuuttariaqarparput.

INUIT ATAQATIGIIT INATSIARTUNI



Amerlasuutigut nunatsinni tunisassiaangitsumik assersuutigalugu nersussuit puulukit nerisaqarneq annertunerujussuuvoq taakkumi kalaaliminerniit akikinnerusumik nioqqutigiqartarmata akissaqarfiginerusuarparput, aali taakku imarpik ikaarlugu nunanit allanit suliarineqarlutillu angallanneqarnikuusut.

Taamatut ingerlaannarneq akueriuminaappoq nunatsinni tunisassiarineqartut eqqortumik sumik tunngaveqarluni taamak akisunerulersarnerat paasisariaqarparput, aqqutissiortariaqarpugut nunatsinni nioqqutissiat nunatta nerisassat tunniussinnaasaat tamatsinnit akissaqarfigineqarlutik nioqqutigineqarsinnaanissaat pisariaqarpoq. Nunatta ilauni tunisassiornerup ingerlanneqarnerani soq taamak akisunerulersitsitigisarnersut ersarissumik politikkikkut iliuuserisinnaasagut ersarinnerulissapput.

Siunnersuutigaara Naalakkersuisut misissuinermik suliaqarnissamik peqquneqassasut nalinaarusialli takutissavaa savaatillip, piniartup, aalisartup naatsisartup tunisassiorfimmut tunineraniit pisisartumut apuunissaata tungaanut akitsorsaataasartut sorpiaanersut.

Pisortanut aningaasatigut allaffissornikkullu kingunerisassai:

A/C fuldmægtigit marluk ukiup affaa suligasuarnissaat 500.000. kr-ninik akeqassasoq naatsorsuutigineqassaaq

Namminersortunut aningaasaatigut allaffissornikkullu kingunerisassai:

Inuussutissarsiorlutik piniartut aalisartut savaatillit allallu eqqornerlunneqannginnissaat anguniagaasaaq tunisaqarnerulersinnaanerallu ammaavigineqarluni.

Innuttaasunut aningaasatigut allaffissornikkullu kingunerisassai:

Innuttaasut kalaallit nerisassiaannik akissaqarnerulernissaanik kinguneqartussamik saqqummiusisoqassaaq.